

docsriver 文川网  
入驻商家 古籍书城

在文川网搜索古籍书城 获取更多电子书

docsriver 文川网  
入驻商家 古籍书城

在文川网搜索古籍书城 获取更多电子书

docsriver 文川网  
入驻商家 古籍书城

在文川网搜索古籍书城 获取更多电子书

# 权德舆诗词全集【共330首】

在线地址<http://www.shicimingju.com/baidu/zuozhe/%E6%9D%83%E5%BE%B7%E8%88%86>

docriver 文川网  
入驻商家 古籍书城  
文川网搜索古籍书城 获取更多电子书

## 《古意》

作者：权德舆 年代：唐

家人强进酒，酒后能忘情。持杯未饮时，众感纷已盈。  
明月照我房，庭柯振秋声。空庭白露下，枕席凉风生。  
所思万里馀，水阔山纵横。佳期凭梦想，未晓愁鸡鸣。  
愿将一心人，当年欢乐平。长筵映玉俎，素手弹秦筝。  
睇呈巧笑，惠音激凄清。此愿良未果，永怀空如醒。

## 《岭上逢久别者又别》

作者：权德舆 年代：唐

十年曾一别，征路此相逢。马首向何处，夕阳千万峰。

## 《玉台体》

作者：权德舆 年代：唐

昨夜裙带解，今朝蟢子飞。  
铅华不可弃，莫是藁砧归。

## 《七夕》

作者：权德舆 年代：唐

佳期人不见，天上喜新秋。玉珮沾清露，香车渡浅流。  
东西一水隔，迢递两年愁。别有穿针处，微明月映楼。

## 《七夕》

作者：权德舆 年代：唐

今日云輶渡鹊桥，应非脉脉与迢迢。  
家人兢喜开妆镜，月下穿针拜九霄。

## 《苏小小墓》

作者：权德舆 年代：唐

万古荒坟在，悠然我独寻。寂寥红粉尽，冥寞黄泉深。  
蔓草映寒水，空郊暖夕阴。风流有佳句，吟眺一伤心。

## 《奉和李相公早朝于中书候传点偶书所怀，奉呈》

作者：权德舆 年代：唐

五更钟漏歇，千门扃钥开。紫宸残月下，黄道晓光来。  
辨色趋中禁，分班列上台。祥烟初缭绕，威凤正裴回。  
斧藻归全德，轮辕适众材。化成风偃草，道合鼎调梅。  
渥命随三接，皇恩畅九垓。嘉言造膝去，喜气沃心回。  
东阁延多士，南山赋有台。阳春那敢和，空此咏康哉。

## 《寓兴》

作者：权德舆 年代：唐

弱冠无所就，百忧钟一身。世德既颠坠，素怀亦堙沦。  
风烟隔高丘，羸疾滞漳滨。昭代未通籍，丰年犹食贫。  
敢求庖有鱼，但虑甑生尘。俯首愧僮仆，蹇步羞亲宾。  
岂伊当途者，一一由中人。已矣勿复言，吾将问秋旻。

## 《从事淮南府过亡友杨校书旧厅感念愀然》

作者：权德舆 年代：唐

故人随化往，倏忽今七霜。及我就拘限，清风留此堂。  
松竹逾映蔚，芝兰自销亡。绝弦罢流水，闻笛同山阳。  
炯如冰玉姿，粲若鸾凤章。欲翥摧劲翮，先秋落贞芳。  
正平赋鸚鵡，文考颂灵光。二子古不吊，夫君今何伤。  
黄墟既杳杳，玄化亦茫茫。岂必限宿草，含凄洒衣裳。

## 《玉台体十二首》

作者：权德舆 年代：唐

鸾啼兰已红，见出凤城东。粉汗宜斜日，衣香逐上风。  
情来不自觉，暗驻五花骢。  
婵娟二八正娇羞，日暮相逢南陌头。  
试问佳期不肯道，落花深处指青楼。  
隐映罗衫薄，轻盈玉腕圆。相逢不肯语，微笑画屏前。  
知向辽东去，由来几许愁。破颜君莫怪，娇小不禁羞。  
楼上吹箫罢，闺中刺绣阑。佳期不可见，尽日泪潺潺。  
泪尽珊瑚枕，魂销玳瑁床。罗衣不忍著，羞见绣鸳鸯。  
君去期花时，花时君不至。檐前双燕飞，落妾相思泪。  
空闺灭烛后，罗幌独眠时。泪尽肠欲断，心知人不知。  
秋风一夜至，吹尽后庭花。莫作经时别，西邻是宋家。  
独自披衣坐，更深月露寒。隔帘肠欲断，争取下阶看。  
昨夜裙带解，今朝蟢子飞。铅华不可弃，莫是藁砧归。  
万里行人至，深闺夜未眠。双眉灯下扫，不待镜台前。

## 《奉和礼部尚书酬杨著作竹亭歌》

作者：权德舆 年代：唐

直城朱户相逶迤，九逵丹毂声阗阗。春官自有桃源赏，  
终日南山当目前。晨摇玉佩趋温室，莫入竹溪疑洞天。  
烟销雨过看不足，晴翠鲜飙逗深谷。独谣一曲泛流霞，  
闲对千竿连净绿。萦回疏凿随胜地，石磴岩扉光景异。  
虚斋寂寂清籁吟，幽涧纷纷杂英坠。家承麟趾贵，  
剑有龙泉赐，上奉明时事无事。人间方外兴偏多，  
能以簪缨狎薜萝。常通内学青莲偈，更奏新声白雪歌。  
风入松，云归栋，鸿飞灭处犹目送。蝶舞闲时梦忽成，  
兰台有客叙交情，返照中林曳履声。直为君恩催造膝，  
东方辨色谒承明。

## 《杂兴五首》

作者：权德舆 年代：唐

丛鬓愁眉时势新，初笄绝代北方人。  
一颦一笑千金重，肯似成都夜失身。  
乍听丝声似竹声，又疑丹穴九雏惊。

金波露洗净于昼，寂寞不堪深夜情。  
琥珀尊开月映帘，调弦理曲指纤纤。  
含羞敛态劝君住，更奏新声刮骨盐。  
乳燕双飞莺乱啼，百花如绣照深闺。  
新妆对镜知无比，微笑时时出瓠犀。  
巫山云雨洛川神，珠襦香腰稳称身。  
惆怅妆成君不见，含情起立问傍人。

### 《奉和许阁老酬淮南崔十七端公见寄》

作者：权德舆 年代：唐

文行蕴良图，声华挹大巫。抡才超粉署，驳议在黄枢。  
自得环中辨，偏推席上儒。八音谐雅乐，七轡骋康衢。  
密侍仝锵珮，雄才本弃繻。炉烟霏琐闼，宫漏滴铜壶。  
旧友双鱼至，新文七义敷。断金挥丽藻，比玉咏生刍。  
交辟尝推重，单辞忽受诬。风波疲贾谊，岐路泣杨朱。  
溟涨前程险，炎荒旅梦孤。空悲鸢跼水，翻羨雁衔芦。  
故国方迢递，羁愁自郁纡。远猷来象魏，霈泽过番禺。  
尽室扁舟客，还家万里途。索居因仕宦，著论拟潜夫。  
帆席来应驶，郊园半已芜。夕阳寻古径，凉吹动纤枯。  
忆昔同驱传，忘怀或据梧。幕庭依古刹，缙税给中都。  
瓜步经过惯，龙沙眺听殊。春山岚漠漠，秋渚露涂涂。  
孰谓原思病，非关宁武愚。方看警獬豸，俄叹縶騊駼。  
芳讯风情在，佳期岁序徂。二贤欢最久，三益义非无。  
柏悦心应尔，松寒志不渝。子将陪禁掖，亭伯限江湖。  
交分终推毂，离忧莫向隅。分曹日相见，延首忆田苏。

### 《伏蒙十七叔寄示喜庆感怀三十韵因献之》

作者：权德舆 年代：唐

受氏自有殷，树功缅前秦。圭田接土宇，侯籍相纷纶。  
道义集天爵，菁华极人文。握兰中台并，折桂东堂春。  
祖德蹈前哲，家风播清芬。先公秉明义，大节逢艰屯。  
独立挺忠孝，至诚感神人。命书备追锡，迹远道不伸。  
小生谅无似，积庆遭昌辰。九年西掖忝，五转南宫频。  
司理因旷职，曲台仍礼神。愧非夔龙姿，忽佐尧舜君。  
内惟负且乘，徒以弱似仁。岂足议大政，所忧玷彝伦。  
叔父贞素履，含章穷典坟。百氏若珠贯，九流皆翠分。  
黄钟蕴声调，白玉那缁磷。清论坐虚室，长谣宣幅巾。  
开关接人祠，支策无俗宾。种杏当暑热，烹茶含露新。  
并径交碧藓，轩窗栖白云。飞沉禽鱼乐，芬馥兰桂薰。  
经术弘义训，息男茂嘉闻。筮仕就色养，宴居忘食贫。  
四方有翘车，上国有蒲轮。行当反招隐，岂得常退身。  
秦吴路杳杳，朔海望云云。侍坐驰梦寐，结怀积昏昕。  
发函捧新诗，慈诲情殷勤。省躬日三复，拜首书诸绅。

### 《送别沅汎》

作者：权德舆 年代：唐

念尔强学殖，非贯早从师。温温稟义方，慥慥习书诗。  
计偕来上国，宴喜方怡怡。经术既修明，艺文亦葳蕤。  
伊予谅无取，琐质荷洪慈。偶来贰仪曹，量力何可支。  
废业固相受，避嫌诚自私。徇吾刺促心，婉尔康庄姿。  
古人贵直道，内讼乖坦夷。用兹处大官，无乃玷清时。  
羸车出门去，怅望交涕洟。琢磨贵分阴，岁月若飙驰。

docsriver 文川网  
入驻商家 古籍书城

在文川网搜索古籍书城 获取更多电子书

千里起足下，丰年系辍车基。苟令志气坚，伫见纓珮随。  
斑斓五彩服，前路春物熙。旧游忆江南，环堵留蓬茨。  
湖水白于练，莼羹细若丝。别来十三年，梦寐时见之。  
宠荣忽逾量，荏苒不自知。晨兴愧华簪，止足为灵龟。  
遐路各自爱，大来行可期。青冥在目前，努力调羽仪。

## 《郊居岁暮因书所怀》

作者：权德舆 年代：唐

养拙方去喧，深居绝人事。返耕忘帝力，乐道疏代累。  
悠然衡茅下，便有江海意。宁知肉食尊，自觉儒衣贵。  
烟霜当暮节，水石多幽致。三径日闲安，千峰对深邃。  
策藜出村渡，岸帻寻古寺。月魄清夜琴，猿声警朝寐。  
地偏芝桂长，境胜烟霞异。独鸟带晴光，疏篁净寒翠。  
窗前风叶下，枕上溪云至。散发对农书，斋心看道记。  
清言核名理，开卷穷精义。求誉观朵颐，危身陷芳饵。  
纷吾守孤直，世业常恐坠。就学缉韦编，铭心对歆器。  
元和畅万物，动植咸使遂。素履期不渝，永怀丘中志。

## 《赠友人》

作者：权德舆 年代：唐

知向巫山逢日暮，轻袿玉佩暂淹留。  
晓随云雨归何处，还是襄王梦觉愁。

## 《奉酬从兄南仲见示十九韵》

作者：权德舆 年代：唐

晋季天下乱，安丘佐关中。德辉霁家牒，侯籍推时功。  
簪纓盛西州，清白传素风。逢时有舒卷，缮性无穷通。  
吾兄挺奇资，向晦道自充。耕凿汝山下，退然安困蒙。  
诗成三百篇，儒有一亩宫。琴书满座右，芝朮生墙东。  
丽藻粲相鲜，晨辉艳芳丛。清光杳无际，皓魄流霜空。  
邦有贤诸侯，主盟词律雄。荐贤比文举，理郡迈文翁。  
楼中赏不独，池畔醉每同。圣朝辟四门，发迹贵名公。  
小生何为者，往岁学雕虫。华簪映武弁，一年被微躬。  
开缄捧新诗，琼玉寒青葱。谬进空内讼，结怀远忡忡。  
时来无自疑，刷翮摩苍穹。

## 《和李大夫西山祈雨，因感张曲江故事十韵》

作者：权德舆 年代：唐

亚相冠貂蝉，分忧统十联。火星当永日，云汉倬炎天。  
斋禱期灵贶，精诚契昔贤。中宵出驺驭，清夜旅牲牲。  
触日看初起，随车应物先。雷音生绝巘，雨足晦平阡。  
潇洒四冥合，空濛万顷连。歌谣喧泽国，稼穡遍原田。  
故事三台盛，新文七义全。作霖应自此，天下待丰年。

## 《放歌行》

作者：权德舆 年代：唐

夕阳不驻东流急，荣名贵在当年立。青春虚度无所成，  
白首衔悲亦何及。拂衣西笑出东山，君臣道合俄顷间。  
一言一笑玉墀上，变化生涯如等闲。朱门杳杳列华戟，  
座中皆是王侯客。鸣环动珮暗珊珊，骏马花骝白玉鞍。

十千斗酒不知贵，半醉留宾邀尽欢。银烛煌煌夜将久，侍婢金盃泻春酒。春酒盛来琥珀光，暗闻兰麝几般香。乍看皓腕映罗袖，微听清歌发杏梁。双鬟美人君不见，一一皆胜赵飞燕。迎杯乍举石榴裙，匀粉时交合欢扇。未央钟漏醉中闻，联骑朝天曙色分。双阙烟云遥霭霭，五衢车马乱纷纷。罢朝鸣珮骤归鞍，今日还同昨日欢。岁岁年年恣游宴，出门满路光辉遍。一身自乐何足言，九族为荣真可羨。男儿称意须及时，闭门下帷人不知。年光看逐转蓬尽，徒咏东山招隐诗。

### 《拜昭陵过咸阳墅》

作者：权德舆 年代：唐

季子乏二顷，扬雄才一廛。伊予此南亩，数已逾前贤。顷岁辱明命，铭勋镂贞坚。遂兹操书致，内顾增缺然。乃葺场圃事，迨今三四年。适因昭陵拜，得抵咸阳田。田夫竞致辞，乡耆争来前。村盘既罗列，鸡黍皆珍鲜。古称禄代耕，人以食为天。自惭廩给厚，谅使井税先。涂涂沟塍雾，漠漠桑柘烟。荒蹊没古木，精舍临秋泉。池笼岂所安，樵牧乃所便。终当解纆络，田里谐因缘。

### 《醉后》

作者：权德舆 年代：唐

美禄与贤人，相逢自可亲。愿将花柳月，尽赏醉乡春。

### 《奉和韦曲庄言怀，贻东曲外族诸弟》

作者：权德舆 年代：唐

韦冠冠盖里，鲜原郁青葱。公台睦中外，墅舍邻西东。驷驭出国门，晨曦正曈曈。燕居平外土，野服参华虫。疆畛分古渠，烟霞连灌丛。长幼序以齿，欢言无不同。忆昔全盛时，勋劬播休功。代业扩宇内，光尘蔼墟中。慨息多永叹，歌诗厚时风。小生忝瓜葛，慕义斯无穷。

### 《户部王曹长杨考功崔刑部二院长并同钟陵使府》

作者：权德舆 年代：唐

忽惊西江侣，共作南宫郎。宿昔芝兰室，今兹鸳鹭行。子猷美风味，左户推公器。含毫白雪飞，出匣青萍利。子云尝燕居，作赋似相如。闲成考课奏，别贡贤良书。子玉谅贞实，持刑慎丹笔。秋天鸿鹄姿，晚岁松筠质。伊予诚薄才，何幸复趋陪。偶来坐右掖，空此忆中台。时节东流驶，悲欢追往事。待月登庾楼，排云上萧寺。盍簪莲府宴，落帽龙沙醉。极浦送风帆，灵山眺烟翠。解颐通善谑，喻指穷精义。搦管或飞章，分曹时按吏。雨散与蓬飘，秦吴两寂寥。方期全拥肿，岂望蹶扶摇。夜直分三署，晨趋共九霄。外庭时接武，广陌更连镳。北极星辰拱，南薰气序调。欣随众君子，并立圣明朝。

### 《杂言同用离骚体送张评事襄阳覲省》

作者：权德舆 年代：唐

黯离堂兮日晚，俨壶觞兮送远。远水霁兮微明，杜蘅秀兮白芷生。波泫泫兮烟幂幂，凝暮色于空碧。

纷离念兮随君，溯九江兮经七泽。君之去兮不可留，  
五彩裳兮木兰舟。

## 《月夜江行》

作者：权德舆 年代：唐

扣船不得寐，浩露清衣襟。弥伤孤舟夜，远结万里心。  
幽兴惜瑶草，素怀寄鸣琴。三奏月初上，寂寞寒江深。

## 《杂言和常州李员外副使春日戏题十首》

作者：权德舆 年代：唐

随风柳絮轻，映日杏花明。无奈花深处，流莺三数声。  
兰桡画舸转花塘，水映风摇路渐香。  
任兴不知行近远，更怜微月照鸣榔。  
檐前晓色惊双燕，户外春风舞百花。  
粉署可怜闲对此，唯令碧玉泛流霞。  
枕上觉，窗外晓。怯朝光，惊曙鸟。花坠露，满芳沼。  
柳如丝，风袅袅。佳期远，相见少。试一望，魂杳渺。  
闲庭无事，独步春辉。韶光满目，落蕊盈衣。芳树交柯，  
文禽并飞。婉彼君子，怅然有违。对酒不饮，横琴不挥。  
不挥者何，知音诚稀。  
江春好游衍，处处芳菲积。彩舫入花津，香车依柳陌。  
绿杨烟袅袅，红蕊莺寂寂。如何愁思人，独与风光隔。  
曙月渐到窗前，移尊更就芳筵。轻吹乍摇兰烛，  
春光暗入花钿。丝竹偏宜静夜，绮罗共占韶年。  
不遣通宵尽醉，定知辜负风烟。  
露洗百花新，帘开月照人。绿窗销暗烛，兰径扫清尘。  
双燕频惊梦，三桃竞报春。相思寂不语，珠泪洒红巾。  
雨歇风轻一院香，红芳绿草接东墙。  
春衣试出当轩立，定被邻家暗断肠。  
春风半，春光遍。柳如丝，花似霰。归心劳梦寐，  
远目伤游眄。可惜长安无限春，年年空向江南见。

## 《薄命篇》

作者：权德舆 年代：唐

昔住邯郸年尚少，只是娇羞弄花鸟。青楼碧纱大道边，  
绿杨日暮风袅袅。婬娟玉貌二八余，自怜颜色花不如。  
丽质全胜秦氏女，藁砧宁用专城居。岁去年来年渐长，  
青春红粉全堪赏。玉楼珠箔但闲居，南陌东城讵来往。  
韶光日日看渐迟。漂梅既落行有时。宁知燕赵娉婷子，  
翻嫁幽并游侠儿。年年结束青丝骑，出门一去何时至。  
秋月空悬翡翠帘，春帏懒卧鸳鸯被。沙塞经时不寄书，  
深闺愁独意何如。花前拭泪情无限，月下调琴恨有余。  
离别苦多相见少，洞房愁梦何由晓。闲看双燕泪霏霏，  
静对空床魂悄悄。镜里红颜不自禁，陌头香骑动春心。  
为问佳期早晚是，人人总解有黄金。

## 《书绅诗》

作者：权德舆 年代：唐

和静有真质，斯人称最灵。感物感天性，触里纷多名。  
祸机生隐微，智者鉴未形。败礼因近习，哲人自居贞。  
当令念虑端，鄙嫚不能萌。苟非不逾矩，焉得遂性情。

谨之在事初，动用各有程。千里起步武，誓云自纤茎。  
心源一流放，骇浪奔长鲸。渊木苟端深，枝流则贞清。  
和理通性术，悠久方昭明。先师留中庸，可以导此生。

### 《奉和新卜城南郊居得与卫右丞邻舍，因赋诗寄》

作者：权德舆 年代：唐

上宰坐论道，郊居仍里仁。七符既昭晰，万象随陶钧。  
旭旦下玉墀，鸣驺拂车茵。轩窗退残暑，风物迎萧辰。  
山泽屣雨出，林塘鱼鸟驯。岂同求羊径，共是羲皇人。  
石君五曹重，左户三壤均。居止烟火接，逢迎鸡黍频。  
大方本无隅，盛德必有邻。千年郢曲后，复此闻阳春。

### 《奉和鄜州刘大夫麦秋出师遮虏有怀朝亲故》

作者：权德舆 年代：唐

天子爱全才，故人雄外台。绿油登上将，青绶亚中台。  
亭障鸣笳入，风云转旆来。兰坊分杳杳，麦垄望莓莓。  
月向雕弓满，莲依宝剑开。行师齐鹤列，锡马尽龙媒。  
壮志征染甫，嘉招萃楚材。千寻推直干，百炼去纤埃。  
间阔劳相望，欢言幸早陪。每联花下骑，几泛竹间杯。  
芳讯双鱼远，流年两鬓催。何时介圭觐，携手咏康哉。

### 《太原郑尚书远寄新诗，走笔酬赠，因代书贺》

作者：权德舆 年代：唐

晓开阊阖出丝言，共喜全才镇北门。职重油幢推上略，  
荣兼革履见深恩。昔岁经过同二仲，登朝并命惭无用。  
曲台分季奉斋祠，直笔系年陪侍从。芬芳鸡舌向南宫，  
伏奏丹墀迹又同。公望数承黄纸诏，虚怀自号白云翁。  
戎装躐蹀纷出祖，金印煌煌宠司武。时看介士阅犀渠，  
每狎儒生冠章甫。晋祠汾水古并州，千骑双旌居上头。  
新握兵符应感激，远缄诗句更风流。缙衣诸侯谅称美，  
白衣尚书何可比。只今麟阁待丹青，努力加餐报天子。

### 《酬李二十二兄主簿马迹山见寄》

作者：权德舆 年代：唐

杳杳尘外想，悠悠区中缘。如何战未胜，曾是教所牵。  
远郊有灵峰，夙昔栖真仙。鸾声去已久，马迹空依然。  
丹崖转初旭，碧落凝秋烟。松风共萧飒，萝月想婵娟。  
内兄蕴遐心，嘉遁性所便。不能栖枳棘，且复探云泉。  
中有冥寂人，闲读逍遥篇。联袂共支策，扞衣尝绝编。  
徐行石上苔，静韵风中弦。烟霞湿儒服，日月生寥天。  
新诗来起予，璀璨七义全。能尽含写意，转令山水鲜。  
若闻笙鹤声，宛在在目前。登攀阻心赏，愁绝空怀贤。  
出处岂异途，心冥即真筌。暂从西府檄，终卧东菑田。  
不嫌予步蹇，但恐君行膻。如能固旷怀，谷口期穷年。

### 《祗命赴京，途次淮口，因书所怀》

作者：权德舆 年代：唐

弱植素寡偶，趋时非所任。感恩再登龙，求友皆断金。  
彪炳睹奇采，凄锵闻雅音。适欣佳期接，遽叹离思侵。  
靡靡遵远道，忡忡劳寸心。难成独酌谣，空奏伐木吟。

沓寥清冬时，萧索白昼阴。交欢谅如昨，滞念纷在今。  
因风试矫翼，倦飞会归林。向晚清淮驶，回首楚云深。

### 《奉送韦起居老舅百口假满归嵩阳旧居》

作者：权德舆 年代：唐

威风翔紫气，孤云出寥天。奇采与幽姿，缥缈皆自然。  
尝闻陶唐氏，亦有巢由全。以此耸风俗，岂必效羁牵。  
大君遂群方，左史蹈前贤。振衣去朝市，赐告归林泉。  
滑和固难久，循性得所便。有名皆畏途，无事乃真筌。  
旧壑穷杳窅，新潭漾沦涟。岩花落又开，山月缺复圆。  
轻策逗萝径，幅巾凌翠烟。机闲鱼鸟狎，体和芝朮鲜。  
四皓本违难，二疏犹待年。况今寰海清，复此鬓发玄。  
顾惭纓上尘，未绝区中缘。齐竽终自退，心寄嵩峰巅。

### 《送张曹长工部大夫奉使西番》

作者：权德舆 年代：唐

殊邻覆露同，奉使小司空。西候车徒出，南台节印雄。  
吊祠将渥命，导驿畅皇风。故地山河在，新恩玉帛通。  
塞云凝废垒，关月照惊蓬。青史书归日，翻轻五利功。

### 《送灵武范司空》

作者：权德舆 年代：唐

上略在安边，吴钩结束鲜。三公临右地，七萃拥中坚。  
旧垒销烽火，新营辨井泉。伐谋师以律，贾勇士争先。  
塞迥晴看月，沙平远际天。荣薰知屈指，应在盛秋前。

### 《送杜尹赴东都》

作者：权德舆 年代：唐

商於留异绩，河洛贺新迁。朝选吴公守，时推杜尹贤。  
如纶披凤诏，出匣淬龙泉。风雨交中土，簪裾敞别筵。  
清明人比玉，照灼府如莲。伫报司州政，征黄似颍川。

### 《奉和张仆射朝天行》

作者：权德舆 年代：唐

元侯重寄贞师律，三郡四封今静谧。丹毂常思阙下来，  
紫泥忽自天中出。军装喜气倍趋程，千骑鸣珂入凤城。  
周王致理称申甫，今日贤臣见明主。拜恩稽首纷无已，  
凝旒前席皇情喜。逢时自是山出云，献可还同石投水。  
昔岁褰衣梁甫吟，当时已有致君心。专城一鼓妖氛静，  
拥旆十年天泽深。日日披诚奉昌运，王人织路传清问。  
仙酝尝分玉斝浓，御闲更辍金羈骏。元正前殿朝君臣，  
一人负扆百福新。宫悬彩仗俨然合，瑞气炉烟相与春。  
万年枝上东风早，珮玉晨趋光景好。涂山已见首诸侯，  
麟阁终当画元老。温室沈沈漏刻移，退朝宾侣每相随。  
雄词乐职波涛阔，旷度交欢云雾披。自古全才贵文武，  
懦夫只解冠章甫。见公抽匣百炼光，试欲磨铅谅无助。

### 《卦名诗》

作者：权德舆 年代：唐

节变忽惊春，临风骋望频。支颐倦书幌，步履整山巾。  
时鸟渐成曲，杂芳随意新。曙霞连观阙，绮陌丽咸秦。  
天地今交泰，云雷背遯屯。中孚谅可乐，书此示家人。

## 《古人名诗》

作者：权德舆 年代：唐

藩宣秉戎寄，衡石崇势位。年纪信不留，弛张良自愧。  
樵苏则为愜，瓜李斯可畏。不顾荣官尊，每陈丰亩利。  
家林类岩巘，负郭躬敛积。忌满宠生嫌，养蒙恬胜智。  
疏松皓月晓，晚景丹霞异。涧谷永不谖，山梁冀无累。  
颇符生肇学，得展禽尚志。从此直不疑，支离疏世事。

## 《建除诗》

作者：权德舆 年代：唐

建节出王都，雄雄大丈夫。除书加右职，骑吏拥前驱。  
满月张繁弱，含霜耀鹿卢。平明跃骖裹，清夜击珊瑚。  
定远功那比，平津策乃迂。执心思报国，效节在忘躯。  
破胆销丹浦，颯蛾舞绿珠。危冠徒自爱，长轂事应殊。  
成绩封千室，畴芳使五符。收功轻骠卫，致埋迈黄虞。  
开济今如此，英威古不侔。闭关草玄者，无乃误为儒。

## 《桃源篇》

作者：权德舆 年代：唐

小年尝读桃源记，忽睹良工施绘事。岩径初欣缭绕通，  
溪风转觉芬芳异。一路鲜云杂彩霞，渔舟远远逐桃花。  
渐入空濛迷鸟道，宁知掩映有人家。庞眉秀骨争迎客，  
凿井耕田人世隔。不知汉代有衣冠，犹说秦家变阡陌。  
石髓云英甘且香，仙翁留饭出青囊。相逢自是松乔侣，  
良会应殊刘阮郎。内子闲吟倚瑶瑟，玩此沈沈销永日。  
忽闻丽曲金玉声，便使老夫思阁笔。

## 《送崔谕德致政东归》

作者：权德舆 年代：唐

天子坐法宫，诏书下江东。懿此嘉遁士，蒲车赴丘中。  
褐衣入承明，朴略多古风。直道侍太子，昌言沃宸聪。  
岩居四十年，心与鸥鸟同。一朝受恩泽，自说如池龙。  
乞骸归故山，累疏明深衷。大君不夺志，命锡忽以崇。  
旭日出国门，轻装若秋蓬。家依白云峤，手植丹桂丛。  
竹斋引寒泉，霞月相玲珑。旷然解赤绶，去逐冥冥鸿。

## 《侍从游后湖宴坐》

作者：权德舆 年代：唐

绝境殊不远，湖塘直吾庐。烟霞旦夕生，泛览诚可娱。  
慈颜俯见喻，辍尔诗与书。清旭理轻舟，嬉游散烦劬。  
宿雨荡残燠，惠风与之俱。心灵一开旷，机巧眇已疏。  
中流有荷花，花实相芬敷。田田绿叶映，艳艳红姿舒。  
繁香好风结，净质清露濡。丹霞无容辉，嫫色亦踟蹰。  
秣芳射水木，欹叶游龟鱼。化工若有情，生植皆不如。  
轻舟任沿溯，毕景乃踟蹰。家人亦恬旷，稚齿皆忻愉。  
素弦激凄清，旨酒盈樽壶。寿觞既频献，乐极随歌呼。

圆月初出海，澄辉来满湖。清光照酒酣，俯倾百虑无。  
以兹心目畅，敌彼名利途。轻肥何为者，浆藿自有馀。  
愿销区中累，保此湖上居。无用诚自适，年年玩芙蕖。

### 《暮春闲居示同志》

作者：权德舆 年代：唐

避喧非傲世，幽兴乐郊园。好古每开卷，居贫常闭门。  
曙钟来古寺，旭日上西轩。稍与清境会，暂无尘事烦。  
静看云起灭，闲望鸟飞翻。乍问山僧偈，时听渔父言。  
体羸谙药性，事简见心源。冠带惊年长，诗书喜道存。  
小池泉脉凑，危栋燕雏喧。风入松阴静，花添竹影繁。  
灌园输井税，学稼奉晨昏。此外知何有，怡然向一樽。

### 《奉和于司空二十五丈新卜城南郊居接司徒公别》

作者：权德舆 年代：唐

一德承昌运，三公翊至尊。云龙谐理代，鱼水见深恩。  
别墅池塘晓，晴郊草木蕃。沟塍连杜曲，茅土盛于门。  
卜筑因登览，经邦每讨论。退朝鸣玉会，入室断金言。  
材俊依东阁，壶觞接后园。径深云自起，风静叶初翻。  
宰物归心匠，虚中即化源。巴人宁敢和，空此愧游藩。

### 《奉和度支李侍郎早朝》

作者：权德舆 年代：唐

凤驾趋北阙，晓星启东方。鸣驺分骑吏，列烛散康庄。  
照灼华簪并，逶迤绮陌长。腰金初辨色，喷玉自生光。  
献替均三壤，贞明集百祥。下才叨接武，空此愧文昌。

### 《酬崔千牛四郎早秋见寄》

作者：权德舆 年代：唐

浩歌坐虚室，庭树生凉风。碧云灭奇彩，白露萎芳丛。  
感此时物变，悠然遐想通。偶来被簪组，自觉如池龙。  
少年才藻新，金鼎世业崇。凤文已彪炳，琼树何青葱。  
联镳长安道，接武承明宫。君登玉墀上，我侍彤庭中。  
疲病多内愧，切磋常见同。起予览新诗，逸韵凌秋空。  
相爱每不足，因兹寓深衷。

### 《酬陆四十楚源春夜宿虎丘山对月寄梁四敬之兼》

作者：权德舆 年代：唐

东风变蘅薄，时景日妍和。更想千峰夜，浩然幽意多。  
蕙香袭闲趾，松露滋乔柯。潭影漾霞月，石床封薜萝。  
夫君非岁时，已负青冥姿。龙虎一门盛，渊云四海推。  
駸駸步履裹，婉婉翥长离。悬圃尽琼树，家林轻桂枝。  
声荣徒外奖，恬淡方自适。逸气凌颢清，仁祠访金碧。  
芊眠瑶草秀，断续云窦滴。芳讯发幽缄，新诗比良觌。  
故人石渠署，美价满中朝。落落杉松直，芬芬兰杜飘。  
雄词鼓溟海，旷达豁烟霄。营道幸同术，论心皆后凋。  
循环伐木咏，缅邈招隐情。惭兹拥肿才，爱彼潺湲清。  
拘牵尚多故，梦想何由并。终结方外期，不待华发生。

## 《奉和李大夫题郑评事江楼》

作者：权德舆 年代：唐

达士无外累，隐几依南郭。茅栋上江开，布帆当砌落。  
支颐散华发，欹枕曝灵药。入鸟不乱行，观鱼还自乐。  
何时金马诏，早岁建安作。往事尽筌蹄，虚怀寄杯杓。  
邦君驻千骑，清论时间酌。凭槛出烟埃，振衣向寥廓。  
心源齐彼是，人境胜岩壑。何必栖冥冥，然为避增缴。

## 《寄临海郡崔稚璋》

作者：权德舆 年代：唐

美酒步兵厨，古人尝宦游。赤城临海峤，君子今督邮。  
吏隐丰暇日，琴壶共冥搜。新诗寒玉韵，旷思孤云秋。  
志士诚勇退，鄙夫自包羞。终当就知己，莫恋潺湲流。

## 《送韦行军员外赴河阳》

作者：权德舆 年代：唐

五代武弁侍明光，辍佐中权拜外郎。记事还同楚倚相，  
传经远自汉扶阳。离堂处处罗簪组，东望河桥壮鼙鼓。  
三城晓角启轩门，一县繁花照莲府。上略儒风并者稀，  
翩翩骕骦有光辉。只今右职多虚位，应待他时伏奏归。

## 《送安南裴都护》

作者：权德舆 年代：唐

忽佩交州印，初辞列宿文。莫言方任远，且贵主忧分。  
迴转朱鸢路，连飞翠羽群。戈船航涨海，旌旆卷炎云。  
绝徼褰帷识，名香夹毂焚。怀来通北户，长养洽南薰。  
暂叹同心阻，行看异绩闻。归时无所欲，薏苡或烦君。

## 《送文畅上人东游》

作者：权德舆 年代：唐

桑门许辩才，外学接宗雷。护法麻衣净，翻经贝叶开。  
宗通知不染，妄想自堪哀。或结西方社，师游早晚回。

## 《晓发武阳馆即事书情》

作者：权德舆 年代：唐

清晨策羸车，嘲晰闻村鸡。行将骑吏亲，日与情爱睽。  
东风变林樾，南亩事耕犁。青菰冒白水，方塘接广畦。  
杂英被长坂，野草蔓幽蹊。泻卤成沃壤，枯株发柔萋。  
芳树莺命雏，深林麋引麕。杳杳途未极，团团日已西。  
哲士务纓弁，鄙夫恋蓬藜。终当税尘驾，盥濯依春溪。

## 《赠文敬太子挽歌词二首》

作者：权德舆 年代：唐

盘石公封重，瑶山赠礼尊。归全荣备物，乐善积深恩。  
雁沼寒波咽，鸾旌夕吹翻。唯馀西靡树，千古霸陵原。  
铜壶晓漏初，羽翼拥涂车。方外留鸿宝，人间得善书。  
清笳悲画绶，朱邸散长裾。还似缙山驾，飘飘向碧虚。

## 《数名诗》

作者：权德舆 年代：唐

一区扬雄宅，恬然无所欲。二顷季子田，岁晏常自足。  
三端固为累，事物反徽束。四体苟不勤，安得丰菽粟。  
五侯诚暋晔，荣甚或为辱。七翻未鸾翔，虞罗乃相触。  
七人称作者，杳杳有遐躅。八桂挺奇姿，森森照初旭。  
九歌伤泽畔，怨思徒刺促。十翼有格言，幽贞谢浮俗。

## 《星名诗》

作者：权德舆 年代：唐

虚怀何所欲，岁晏聊懒逸。云翼谢翩翩，松心保贞实。  
风秋景气爽，叶落井径出。陶然美酒酣，所谓幽人吉。  
自当轻尺璧，岂复扫一室。安用簪进贤，少微斯可必。

## 《德宗神武孝文皇帝挽歌词三首》

作者：权德舆 年代：唐

覆露雍熙运，澄清教化源。赧歌凝庶绩，羽舞被深恩。  
纂业光文祖，贻谋属孝孙。恭闻留未命，犹是爱元元。  
梯航来万国，玉帛庆三朝。湛露恩方浹，薰风曲正调。  
晏车悲鹵簿，广乐遏箫韶。最怆号弓处，龙髯上紫霄。  
常时柏梁宴，今日谷林归。玉辇恩波遍，灵輶烟雨霏。  
乔山森羽骑，渭水拥旌旂。仙驭何由见，耘田鸟自飞。

## 《顺宗至德大安孝皇帝挽歌三首》

作者：权德舆 年代：唐

十叶开昌运，三辰丽德音。荐功期瘞玉，昭俭每捐金。  
解泽皇风遍，虞泉白日沈。仍闻起居注，焚奏感人心。  
孝理本忧勤，玄功在啬神。睿图传上嗣，寿酒比家人。  
仙驭三清远，行宫万象新。小臣司吉从，还扈属车尘。  
候晓传清跸，迎风引彩旒。共瞻宫辂出，遥想望陵愁。  
弓剑随云气，衣冠奉月游。空余驾龙处，摇落鼎湖秋。

## 《浩歌》

作者：权德舆 年代：唐

杖策出蓬荜，浩歌秋兴长。北风吹荷衣，萧飒景气凉。  
逋迥抵山郭，里巷连湖光。孤云净远峰，绿水溢芳塘。  
鱼鸟乐天性，杂英互芬芳。我心独何为，万虑萦中肠。  
履道身未泰，主家谋不臧。心为世教牵，迹寄翰墨场。  
出处两未定，羈羸空自伤。沈忧不可裁，伫立河之梁。  
晚归茅檐下，左右陈壶觞。独酌复长谣，放心游八荒。  
得丧同一域，是非亦何常。胡为苦此生，矻矻徒自强。  
乃知杯中物，可使忧患忘。因兹谢时辈，栖息无何乡。

## 《丙寅岁苦贫戏题》

作者：权德舆 年代：唐

清朝起藜床，雪霜对枯篱。家人来告予，今日无晨炊。  
醯醢一已整，新炭固难期。厚生彼何人，工拙各异宜。  
间岁从使檄，亲宾苦川驰。虽非悖而入，与出常相随。  
吴门与南亩，颇亦持磁基。有时遇丰年，岁计犹不支。

颜渊谅贤人，陋巷能自怡。中忆裴子野，泰然倾薄糜。  
愧非古人心，戚戚愁朝饥。近古犹不及，太上那可希。  
奈何时风扇，使我正性衰。巧智竞忧劳，展转生浇漓。  
吾观黄金印，未胜青松枝。粗令有鱼菽，岂复求轻肥。  
顾惭主家拙，甘使群下嗤。如何致一杯，醉后无所知。

### 《奉酬张监阁老雪中过中书见赠加两韵简南省僚》

作者：权德舆 年代：唐

寓直久叨荣，新恩倍若惊。风清五夜永，节换一阳生。  
潘鬓年空长，齐竽艺本轻。常时望连茹，今日剧悬旌。  
枉步欢方接，含毫思又萦。烦君白雪句，岁晏若为情。

### 《春游茅山酬杜评事见寄》

作者：权德舆 年代：唐

喜得赏心处，春山岂计程。连溪芳草合，半岭白云晴。  
绝涧漱冰碧，仙坛挹颢清。怀君在人境，不共此时情。

### 《送韦中丞奉使新罗》

作者：权德舆 年代：唐

淳化洽声明，殊方均惠养。计书重译至，锡命双旌往。  
星辞北极远，水泛东溟广。斗柄辨宵程，天琛宜昼赏。  
孤光洲岛迥，净绿烟霞敞。展礼盛宾徒，交欢觐君长。  
经途劳视听，怆别萦梦想。延颈旬岁期，新恩在归鞅。

### 《送薛温州》

作者：权德舆 年代：唐

昨日馈连营，今来刺列城。方期建礼直，忽访永嘉程。  
郡内裁诗暇，楼中迟客情。凭君减千骑，莫遣海鸥惊。

### 《酬崔舍人阁老，冬至日宿直省中，奉简两掖阁》

作者：权德舆 年代：唐

令节一阳新，西垣宿近臣。晓光连凤沼，残漏近鸡人。  
白雪飞成曲，黄钟律应均。层霄翔迅羽，广陌驻归轮。  
清切晨趋贵，恩华夜直频。辍才时所重，分命秩皆真。  
左掖期连茹，南宫愧积薪。九年叨此地，回首倍相亲。

### 《细柳驿》

作者：权德舆 年代：唐

细柳肃军令，条侯信殊伦。棘门乃儿戏，从古多其人。  
神武今不杀，介夫如搢绅。息驾幸兹地，怀哉悚精神。

### 《韦宾客宅与诸博士宴集》

作者：权德舆 年代：唐

累抗气身章，湛恩比上庠。宾筵征稷嗣，家法自扶阳。  
簪组欢言久，琴壶雅兴长。阴岚冒苔石，轻籁韵风篁。  
佩玉三朝贵，挥金百虑忘。因知卧商洛，岂胜白云乡。

## 《周平西墓》

作者：权德舆 年代：唐

英威今寂寞，陈迹对崇丘。壮志清风在，荒坟白日愁。  
穷泉那复晓，乔木不知秋。岁岁寒塘侧，无人水自流。

## 《惠昭皇太子挽歌词二首》

作者：权德舆 年代：唐

前星落庆霄，蕙露逐晨飙。宫仗黄麾出，仙游紫府遥。  
空嗟风吹去，无复鸡鸣朝。今夜西园月，重轮更寂寥。  
东朝闻楚挽，羽翻依稀转。天归京兆新，日与长安远。  
兰芳落故殿，桂影销空苑。骑吹咽不前，风悲九旗卷。

## 《赠郑国庄穆公主挽歌二首》

作者：权德舆 年代：唐

追饰崇汤沐，遗芳蔼禁闱。秋原森羽卫，夜壑掩容辉。  
睿藻悲难尽，公宫望不归。笳箫向烟雾，疑是彩鸾飞。  
旧馆闭平阳，容车启寿堂。霜凝薜荔落，风度薤歌长。  
淑德图书在，皇慈礼命彰。凄凉霸川曲，垄树已成行。

## 《锡杖歌送明楚上人归佛川》

作者：权德舆 年代：唐

上人远自西天竺，头陀行遍国朝寺。口翻贝叶古字经，  
手持金策声泠泠。护法护身唯振锡，石濂云溪深寂寂。  
乍来松径风更寒，遥映霜天月成魄。后夜空山禅诵时，  
寥寥挂在枯树枝。真法常传心不住，东西南北随缘路。  
佛川此去何时回，应真莫便游天台。

## 《马秀才草书歌》

作者：权德舆 年代：唐

伯英草圣称绝伦，后来学者无其人。白眉年少未弱冠，  
落纸纷纷运纤腕。初闻之子十岁馀，当时时辈皆不如。  
犹轻昔日墨池学，未许前贤团扇书。艳彩芳姿相点缀，  
水映荷花风转蕙。三春并向指下生，万象争分笔端势。  
有时当暑如清秋，满堂风雨寒飕飕。乍疑崩崖瀑水落，  
又见古木饥鼯愁。变化纵横出新意，眼看一字千金贵。  
忆昔谢安问献之，时人虽见那得知。

## 《离合诗赠张监阁老》

作者：权德舆 年代：唐

黄叶从风散，暗嗟时节换。忽见鬓边霜，勿辞林下觞。  
躬行君子道，身负芳名早。帐殿汉官仪，巾车塞垣草。  
交情剧断金，文律每招寻。始知蓬山下，如见古人心。

## 《八音诗》

作者：权德舆 年代：唐

金谷盛繁华，凉台列簪组。石崇留客醉，绿珠当座舞。  
丝泪可销骨，冶容竟何补。竹林谅贤人，满酌无所苦。  
匏居容宴豆，儒室贵环堵。土鼓与污尊，颐神则为愈。

革道当在早，谦光斯可取。木雁才不才，吾知养生主。

## 《七府诗》

作者：权德舆 年代：唐

金罍映玉俎，宾友纷宴喜。木兰泛方塘，桂酒启皓齿。  
水榭临空迥，酣歌当座起。火云散奇峰，瑶瑟韵清徵。  
土梗乃虚论，康庄有逸轨。欲成一编书，谈笑佐天子。

## 《杂诗五首》

作者：权德舆 年代：唐

婉彼嬴氏女，吹箫偶萧史。彩鸾驾非烟，绰约两仙子。  
神期谅交感，相顾乃如此。岂比成都人，琴心中夜起。  
阳台巫山上，风雨忽清旷。朝云与游龙，变化千万状。  
魂交复目断，缥缈难比况。兰泽不可亲，凝情坐惆怅。  
淇水春正绿，上宫兰叶齐。光风两摇荡，鸣珮出中闺。  
一顾授横波，千金呈瓠犀。徒然路傍子，怳怳复凄凄。  
碧树泛鲜飙，玉琴含妙曲。佳人掩鸾镜，婉婉凝相瞩。  
文桂映束素，香黛宜A绿。寂寞远怀春，何时来比目。  
含颦倚瑶瑟，丹慊结繁虑。失身不自还，万恨随玉箸。  
靡芜山下路，团扇秋风去。君看心断时，犹在目成处。

## 《旅馆雪晴，又睹新月，众兴所感，因成杂言》

作者：权德舆 年代：唐

寥寥深夜雪初晴，楼上云开月渐明。池中片影依稀见，  
帘外清光远近生。皎皎晴空疑破镜，广庭积素偏相映。  
珠帘卷却光更深，玉指持来色逾净。梦觉青楼最可怜，  
婵娟素魄满寒天。天地寥寥同一色，秦淮楚江无限极。  
归鸿断猿何处声，深闺旅馆遥相忆。长安五侯华阁开，  
嘉宾列坐倾金罍。赏明月，玩流雪，纤手蛾眉座中设，  
清歌一声无断绝。夜已央，乐未阑。狐裘兽炭不知寒，  
珠环翠珮声珊珊。履舄纷纭桂袖攒，朱颜倚醉尽君欢。  
人生少年全不久，相看且劝杯中酒。丈夫富贵自有期，  
映雪读书徒白首。

## 《夜泊有怀》

作者：权德舆 年代：唐

栖鸟向前林，暝色生寒芜。孤舟去不息，众感非一途。  
川程方浩淼，离思方郁纡。转枕眼未熟，拥衾泪已濡。  
寤然风水上，寝食疲朝晡。心想洞房夜，知君还向隅。

## 《新月与儿女夜坐听琴举酒》

作者：权德舆 年代：唐

泥泥露凝叶，骚骚风入林。以兹皓月圆，不厌良夜深。  
列坐屏轻箑，放怀弦素琴。儿女各冠笄，孙孩绕衣襟。  
乃知大隐趣，宛若沧洲心。方结偕老期，岂惮华发侵。  
笑语向兰室，风流传玉音。愧君袖中字，价重双南金。

## 《竹径偶然作》

作者：权德舆 年代：唐

退朝此休沐，闭户无尘氛。杖策入幽径，清风随此君。  
琴觞恣偃傲，兰蕙相氛氲。幽赏方自适，林西烟景曛。

### 《独酌》

作者：权德舆 年代：唐

独酌复独酌，满盏流霞色。身外皆虚名，酒中有全德。  
风清与月朗，对此情何极。

### 《奉和刘侍郎司徒奉诏伐叛书情呈宰相》

作者：权德舆 年代：唐

玉帐元侯重，黄枢上宰雄。缘情词律外，宣力庙谋中。  
震耀恭天讨，严凝助岁功。行看画麟阁，凛凛有英风。

### 《奉和张舍人阁老阁中直夜，思闻雅琴，因以书》

作者：权德舆 年代：唐

紫垣宿清夜，蔼蔼复沈沈。圆月衡汉净，好风松栝深。  
轩窗韵虚籁，兰雪怀幽音。珠露销暑气，玉徽结遐心。  
盛才本殊伦，雅诤方在今。伫见舒彩翮，翻飞归凤林。

### 《酬陆三十二参浙东见寄》

作者：权德舆 年代：唐

骢马别已久，鲤鱼来自烹。殷勤故人意，怊怅中林情。  
茫茫重江外，杳杳一枝琼。搔首望良觌，为君华发生。

### 《酬主客仲员外见贺正除》

作者：权德舆 年代：唐

五年承乏奉如纶，才薄那堪侍从臣。禁署独闻清漏晓，  
命书惭对紫泥新。周班每喜簪裾接，郢曲偏宜讽咏频。  
忆昔曲台尝议礼，见君论著最相亲。

### 《和韩侍御白发》

作者：权德舆 年代：唐

白发今朝见，虚斋晓镜清。乍分霜简色，微映铁冠生。  
幕下多能事，周行挹令名。流年未可叹，正遇太阶平。

### 《待漏假寐梦归江东旧居》

作者：权德舆 年代：唐

十年江浦卧郊园，闲夜分明结梦魂。舍下烟萝通古寺，  
湖中云雨到前轩。南宗长老知心法，东郭先生识化源。  
觉后忽闻清漏晓，又随簪珥入君门。

### 《省中春晚忽忆江南旧居戏书所怀因寄两浙亲故》

作者：权德舆 年代：唐

前年冠獬豸，戎府随宾介。去年簪进贤，赞导法宫前。  
今兹戴武弁，谬列金门彦。问我何所能，头冠忽三变。  
野性惯疏闲，晨趋兴暮还。花时限清禁，霁后爱南山。  
晚景支颐对尊酒，旧游忆在江湖久。庾楼柳寺共开襟，

docsriver 文川网  
入驻商家 古籍书城

在文川网搜索古籍书城 获取更多电子书

枫岸烟塘几携手。结庐常占练湖春，犹寄藜床与幅巾。  
疲羸只欲思三径，黠直那堪备七人。更想东南多竹箭，  
悬圃琅玕共葱蒨。裁书且附双鲤鱼，偏恨相思未相见。

### 《送三十叔赴任晋陵》

作者：权德舆 年代：唐

春云结暮阴，侍坐捧离襟。黄绶轻装去，青门芳草深。  
十年尘右职，三径寄遐心。便道停桡处，应过旧竹林。

### 《送商州杜中丞赴任》

作者：权德舆 年代：唐

安康地里接商於，帝命专城总赋舆。夕拜忽辞青琐闼，  
晨装独捧紫泥书。深山古驿分驺骑，芳草闲云逐隼旗。  
绮皓清风千古在，因君一为谢岩居。

### 《送浑邓州》

作者：权德舆 年代：唐

年少守南阳，新恩印绶光。轻轩出绕雷，利刃发干将。  
风劲初下叶，云寒方护霜。想君行县处，露冕菊潭香。

### 《送崔端公郎君入京覲省》

作者：权德舆 年代：唐

已见风姿美，仍闻艺业勤。清秋上国路，白皙少年人。  
带月轻帆疾，迎霜彩服新。过庭若有问，一为说漳滨。

### 《送张周二秀才谒宣州薛侍郎》

作者：权德舆 年代：唐

儒衣两少年，春棹毂溪船。湖月供诗兴，岚风费酒钱。  
上帆涵浦岸，欹枕傲晴天。不用愁羁旅，宣城太守贤。

### 《送梁道士谒寿州崔大夫》

作者：权德舆 年代：唐

年少一仙官，清羸驾彩鸾。洞宫云渺渺，花路水漫漫。  
岁计芝田熟，晨装月帔寒。遥知小山桂，五马待邀欢。

### 《送谢孝廉移家越州》

作者：权德舆 年代：唐

家承晋太傅，身慕鲁诸生。又见一帆去，共愁千里程。  
沙平古树迥，潮满晓江晴。从此幽深去，无妨隐姓名。

### 《送韩孝廉侍从赴举》

作者：权德舆 年代：唐

贡士去翩翩，如君最少年。彩衣行不废，儒服代相传。  
晓月经淮路，繁阴过楚天。清谈遇知己，应访孝廉船。

### 《送陆拾遗祗召赴行在》

作者：权德舆 年代：唐

鸛鹭承新命，翻飞入汉庭。歌诗能合雅，献纳每论经。  
月晓蜀江迥，猿啼楚树青。幸因焚草暇，书札访沈冥。

### 《送映师归本寺》

作者：权德舆 年代：唐

还归柳市去，远远出人群。苔鹜桐花落，山窗桂树薰。  
引泉通绝涧，放鹤入孤云。幸许宗雷到，清谈不易闻。

### 《送宇文文府赴行在》

作者：权德舆 年代：唐

送君当岁暮，斗酒破离颜。车骑拥寒水，雪云凝远山。  
且安黄绶屈，莫羨白鸥闲。从此图南路，青云步武间。

### 《送湖南李侍御赴本使赋采菱亭诗》

作者：权德舆 年代：唐

旧俗采菱处，津亭风景和。沅江收暮霭，楚女发清歌。  
曲岸萦湘叶，荒阶上白波。兰桡向莲府，一为枉帆过。

### 《送穆侍御归东都》

作者：权德舆 年代：唐

知君儒服贵，彩绣两相辉。婉婉成名后，翩翩拥传归。  
江深烟屿没，山暗雨云飞。共待酬恩罢，相将去息机。

### 《送人使之江陵》

作者：权德舆 年代：唐

嘉招不辞远，捧檄利攸往。行役念前程，宴游睎旧赏。  
征钲星乍动，江信潮应上。烟水飞一帆，霜风摇五两。  
纷纷别袂举，切切离鸿响。后会杳何时，悠然劳梦想。

### 《丰城剑池驿感题》

作者：权德舆 年代：唐

龙剑昔未发，泥沙相晦藏。向非张茂先，孰辨斗牛光。  
神物不自达，圣贤亦彷徨。我行丰城野，慷慨心内伤。

### 《渭水》

作者：权德舆 年代：唐

吕叟年八十，皤然持钓钩。意在静天下，岂唯食营丘。  
师臣有家法，小白犹尊周。日暮驻征策，爱兹清渭流。

### 《陪包谏议湖墅路中举帆》

作者：权德舆 年代：唐

萧萧凉雨歇，境物望中闲。风际片帆去，烟中独鸟还。  
断桥通远浦，野墅接秋山。更喜陪清兴，尊前一解颜。

### 《富阳陆路》

作者：权德舆 年代：唐

又入乱峰去，远程殊未归。烟萝迷客路，山果落征衣。  
欹石临清浅，晴云出翠微。渔潭明夜泊，心忆谢玄晖。

### 《哭张十八校书》

作者：权德舆 年代：唐

芸阁为郎一命初，桐州寄傲十年馀。魂随逝水归何处，  
名在新诗众不如。蹉跎江浦生华发，牢落寒原会素车。  
更忆八行前日到，含凄为报秣陵书。

### 《题亡友江畔旧居》

作者：权德舆 年代：唐

寥落留三径，柴扉对楚江。蟭蛸集暗壁，蜥蜴走寒窗。  
松盖歇书幌，苔衣上酒缸。平生断金契，到此泪成双。

### 《赠梁国惠康公主挽歌词二首》

作者：权德舆 年代：唐

外馆娉仪贵，中参睿渥深。初笄横白玉，盛服镂黄金。  
风度箫声远，河低婺彩沈。夜台留册谥，凄怆即徽音。  
杳霭异湘川，飘飘驾紫烟。凤楼人已去，鸾镜月空悬。  
雾湿汤沐地，霜凝脂粉田。音容无处所，应在玉皇前。

### 《故太尉兼中书令赠太师西平王挽词》

作者：权德舆 年代：唐

翊戴推元老，谋猷合大君。河山封故地，金石表新坟。  
剑履归长夜，笳箫咽暮云。还经誓师处，薤露不堪闻。

### 《自桐庐如兰溪有寄》

作者：权德舆 年代：唐

东南江路旧知名，惆怅春深又独行。新妇山头云半敛，  
女儿滩上月初明。风前荡飏双飞蝶，花里间关百啭莺。  
满目归心何处说，欹眠搔首不胜情。

### 《和九日从杨氏姊游》

作者：权德舆 年代：唐

秋光风露天，令节庆初筵。易象家人吉，闺门女士贤。  
招邀菊酒会，属和柳花篇。今日同心赏，全胜落帽年。

### 《璩授京兆府参军戏书以示兼呈独孤郎》

作者：权德舆 年代：唐

见尔府中趋，初官足慰吾。老牛还舐犊，凡鸟亦将雏。  
喜至翻成感，痴来或欲殊。因惭玉润客，应笑此非夫。

### 《田家即事》

作者：权德舆 年代：唐

闲卧藜床对落晖，恹然便觉世情非。漠漠稻花资旅食，  
青青荷叶制儒衣。山僧相访期中饭，渔父同游或夜归。

待学尚平婚嫁毕，渚烟溪月共忘机。

## 《和王侍郎病中领度支，烦迫之余，过西园书堂》

作者：权德舆 年代：唐

凭槛辍繁务，晴光烟树分。中邦均禹贡，上药验桐君。  
满径风转蕙，卷帘山出云。锵然玉音发，余兴在斯文。

## 《酬灵彻上人以诗代书见寄》

作者：权德舆 年代：唐

莲花出水地无尘，中有南宗了义人。已取贝多翻半字，  
还将阳焰谕三身。碧云飞处诗偏丽，白月圆时信本真。  
更喜开缄销热恼，西方社里旧相亲。

## 《崔四郎协律以诗见寄，兼惠蜀琴，因以酬赠》

作者：权德舆 年代：唐

临风结烦想，客至传好音。白雪絃郢曲，朱弦巨蜀琴。  
泠泠响幽韵，款款寄遐心。岁晚何以报，与君期断金。

## 《唐开州文编远寄新赋，累惠良药，咏叹仰佩，》

作者：权德舆 年代：唐

风雨蒺藜柯，端忧坐空堂。多病时节换，所思道里长。  
故人朱两轡，出自尚书郎。下车今几时，理行远芬芳。  
琼瑶览良讯，苜蓿满素囊。结根在贵州，蠲疾传古方。  
探擷当五月，殷勤逾八行。深情婉如此，善祝何可忘。  
复有金玉音，焕如龙凤章。一闻灵洞说，若睹群仙翔。  
三清飞庆霄，百汰成雄铎。体物信无对，洒心愿相将。  
昔年同旅食，终日窥文房。春风眺芜城，秋水渡柳杨。  
君为太史氏，弱质羁楚乡。今来忝司谏，千骑遥相望。  
归云夕鳞鳞，圆魄夜苍苍。远思结铃阁，何人交羽觞。  
伫见征颍川，无为薄淮阳。政成看再入，列侍炉烟傍。

## 《送王炼师赴王屋洞》

作者：权德舆 年代：唐

稔岁在芝田，归程入洞天。白云辞上国，青鸟会群仙。  
自以棋销日，宁资药驻年。相看话离合，风驭忽泠然。

## 《送上虞丞》

作者：权德舆 年代：唐

越郡佳山水，菁江接上虞。计程航一苇，试吏佐双凫。  
云壑窥仙籍，风谣验地图。因寻黄绢字，为我吊曹盱。

## 《送卢评事婺州省觐》

作者：权德舆 年代：唐

知向东阳去，晨装见彩衣。客愁青眼别，家喜玉人归。  
漠漠水烟晚，萧萧枫叶飞。双溪泊船处，候吏拜胡威。

## 《送句容王少府簿领赴上都》

作者：权德舆 年代：唐

上国路绵绵，行人候晓天。离亭绿绮奏，乡树白云连。  
江露湿征袂，山莺宜泊船。春风若为别，相顾起尊前。

### 《送山人归旧隐》

作者：权德舆 年代：唐

工为楚辞赋，更著鲁衣冠。岁俭山田薄，秋深晨服寒。  
武人荣燕颔，志士恋渔竿。会被公车荐，知君久晦难。

### 《惠上人房宴别》

作者：权德舆 年代：唐

方袍相引到龙华，支策开襟路不赊。法味已同香积会，  
礼容疑在少施家。逸民羽客期皆至，疏竹青苔景半斜。  
究竟相依何处好，匡山古社足烟霞。

### 《送李处士归弋阳山居》

作者：权德舆 年代：唐

暂来城市意何如，却忆葛阳溪上居。不惮薄田输井税，  
自将嘉句著州闾。波翻极浦樵竿出，霜落秋郊树影疏。  
想到家山无俗侣，逢迎只是坐篮舆。

### 《江城夜泊寄所思》

作者：权德舆 年代：唐

客程殊未极，舫棹泊回塘。水宿知寒早，愁眠觉夜长。  
远钟和暗杵，曙月照晴霜。此夕相思意，摇摇不暂忘。

### 《晓》

作者：权德舆 年代：唐

晓风摇五两，残月映石壁。稍稍曙光开，片帆在空碧。

### 《奉和韦谏议奉送水部家兄上后书情，寄诸兄弟》

作者：权德舆 年代：唐

驷牡龙旂庆至今，一门儒服耀华簪。人望皆同照乘宝，  
家风不重满籛金。护衣直夜南宫静，焚草清时左掖深。  
何幸末班陪两地，阳春欲和意难任。

### 《故司徒兼侍中赠太傅北平王挽词》

作者：权德舆 年代：唐

授律勋庸盛，居中鼎鼐和。佐时调四气，尽力净三河。  
忽访天京兆，空传汉伏波。今朝麟阁上，偏轸圣情多。

### 《中书夜直寄赠》

作者：权德舆 年代：唐

通籍在金闺，怀君百虑迷。迢迢五夜永，脉脉两心齐。  
步履疲青琐，开缄倦紫泥。不堪风雨夜，转枕忆鸿妻。

## 《病中寓直代书题寄》

作者：权德舆 年代：唐

愚夫何所任，多病感君深。自谓青春壮，宁知白发侵。  
寝兴劳善祝，疏懒愧良箴。寂寞闻宫漏，那堪直夜心。

## 《上巳日贡院考杂文不遂赴九华观袂褰之会，以》

作者：权德舆 年代：唐

三日韶光处处新，九华仙洞七香轮。  
老夫留滞何由往，珉玉相和正绕身。  
褰饮寻春兴有余，深情婉婉见双鱼。  
同心齐体如身到，临水烦君便袂除。

## 《句》

作者：权德舆 年代：唐

耒水波纹细，湘江竹叶轻。  
古时楼上清明夜，月照楼前撩乱花。今日成阴复成子，  
可怜春尽未归家。  
新妇矶头云半敛，女儿滩畔月初明。  
回合千峰里，晴光似画图。  
征车随反照，候吏映白云。

## 《昭德皇后挽歌词》

作者：权德舆 年代：唐

淮水源流远，涂山礼命升。往年求故剑，今夕祔初陵。  
鸾镜金波涩，鞶衣玉彩凝。千年子孙庆，孝理在蒸蒸。

## 《卧病喜惠上人、李炼师、茅处士见访，因以赠》

作者：权德舆 年代：唐

沈疴结繁虑，卧见书窗曙。方外三贤人，惠然来相亲。  
整巾起曳策，喜非车马客。支郎有佳文，新句凌碧云。  
霓裳何飘飘，浩志凌紫氛。复有沈冥士，远系三茅君。  
各言麋鹿性，不与簪组群。清言出象系，旷迹逃玄纁。  
心源暂澄寂，世故方纠纷。终当逐师辈，岩桂香氤芬。

## 《古兴》

作者：权德舆 年代：唐

月中有桂树，无翼难上天。海底有龙珠，下隔万丈渊。  
人生大限虽百岁，就中三十称一世。晦明乌兔相推迁，  
雪霜渐到双鬓边。沉忧戚戚多浩叹，不得如意居太半。  
一气暂聚常恐散，黄河清兮白石烂。

## 《过张监阁老宅对酒奉酬见赠》

作者：权德舆 年代：唐

里仁无外事，徐步一开颜。荆玉收难尽，齐竽喜暂闲。  
秋风倾菊酒，霁景下蓬山。不用投车辖，甘从倒载还。

## 《和职方殷郎中留滞江汉初至南宫，呈诸公并见》

作者：权德舆 年代：唐

十载别文昌，藩符寄武当。师贞上介辟，恩擢正员郎。  
藻思烟霞丽，归轩印绶光。还希驻辇问，莫自叹冯唐。

### 《戏和三韵》

作者：权德舆 年代：唐

墨翟突不黔，范丹甑生尘。君今复劳歌，鹤发吹湿薪。  
前诏许真秩，何如巾软轮。

### 《酬穆七侍郎早登使院西楼感怀》

作者：权德舆 年代：唐

耿耿宵欲半，振衣庭户前。浩歌抚长剑，临风泛清弦。  
晴霜丽寒芜，微月露碧鲜。杉梧韵幽籁，河汉明秋天。  
良夜虽可玩，沉忧逾浩然。楼中迟启明，林际挥宿烟。  
晨风响钟鼓，曙色映山川。滔滔天外驶，杲杲朝日悬。  
因穷西南永，得见天地全。动植相纠纷，车从竞喧阗。  
鱣鮪跃洪流，麀麇倚荒阡。啾啾白云雁，嚙嚙清露蝉。  
一气鼓万殊，晦明相推迁。羲和无停鞅，不得常少年。  
当令志气神，及此鬓发玄。岂唯十七族，今古称其贤。  
夫君子气雄，振藻何翩翩。诗轻沈隐侯，赋拟王仲宣。  
小鸟抢榆枋，大鹏激三千。与君期晚岁，方结林栖缘。

### 《送裴秀才贡举》

作者：权德舆 年代：唐

儒衣风貌清，去抵汉公卿。宾贡年犹少，篇章艺已成。  
临流惜暮景，话别起乡情。离酌不辞醉，西江春草生。

### 《送陆太祝赴湖南幕同用送字》

作者：权德舆 年代：唐

不惮征路遥，定缘宾礼重。新知折柳赠，旧侣乘篮送。  
此去佳句多，枫江接云梦。

### 《送别同用阔字》

作者：权德舆 年代：唐

耿耿离念繁，萧萧凉叶脱。缁尘素衣敝，风露秋江阔。  
想得读书窗，岩花对巾褐。

### 《古离别》

作者：权德舆 年代：唐

人生天地间，譬若七轡驰。夭寿既常数，奈何生别离。  
迹当中人域，正性日已衰。是非千万境，杳霭情尘滋。  
出门事何常，暂别亦难期。冉冉叹流景，悠悠限山陂。  
尽此一夕欢，华樽会前墀。鸡鸣东方曙，夙驾临通逵。  
欲出强移步，欲留难致辞。两情不得已，念此留何为。  
天明去已远，寂默居人归。入门复上堂，恍恍生惊疑。  
经履同游处，犹言常相随。览物或临盘，翻怪来何迟。  
乃知前日欢，本为今日悲。特此别后心，宁及未见时。  
则知交疏分，久久翻易持。报君未别后，别后当自知。

## 《奉和崔阁老，清明日候许阁老交直之际，辱裴》

作者：权德舆 年代：唐

紫禁宿初回，清明花乱开。相招直城外，远远上春台。  
谏曹将列宿，几处期子玉。深竹与清泉，家家桃李鲜。  
折芳行载酒，胜赏随君有。愁疾自无惊，临风一搔首。

## 《奉和许阁老霁后慈恩寺杏园看花，同用花字口》

作者：权德舆 年代：唐

杏林微雨霁，灼灼满瑶华。左掖期先至，中园景未斜。  
含毫歌白雪，藉草醉流霞。独限金闺籍，支颐嚼茗花。

## 《和九华观见怀贡院八韵》

作者：权德舆 年代：唐

上巳好风景，仙家足芳菲。地殊兰亭会，人似山阴归。  
丹灶缀珠掩，白云岩径微。真宫集女士，虚室涵春辉。  
拘限心杳杳，欢言望依依。滞兹文墨职，坐与琴觴违。  
丽曲涤烦虚，幽缄发清机。支颐一吟想，恨不双翻飞。

## 《元和元年，蒙恩封成纪县伯，时室中封安喜县》

作者：权德舆 年代：唐

启土封成纪，宜家县安喜。同欣井赋开，共受闺门祉。  
珩璜联采组，琴瑟谐宫徵。更待悬车时，与君欢暮齿。

## 《酬南园新亭宴会璩新第慰庆之作，时任宾客》

作者：权德舆 年代：唐

南宫烟景浓，平视中南峰。官闲似休沐，尽室来相从。  
日抱汉阴瓮，或成蝴蝶梦。树老欲连云，竹深疑入洞。  
欢言交羽觞，列坐俨成行。歌吟不能去，待此明月光。  
好逑蕴明识，内顾多惭色。不厌梁鸿贫，常讥伯宗直。  
予婿信时英，谏垣金玉声。男儿才弱冠，射策幸成名。  
偃放斯自足，悠然去营欲。散木固无堪，虚舟常任触。  
大隐本吾心，喜君流好音。相期悬车岁，此地即中林。

## 《奉和圣制中春麟德殿会百僚观新乐》

作者：权德舆 年代：唐

仲春蔼芳景，内庭宴群臣。森森列干戚，济济趋钩陈。  
大乐本天地，中和序人伦。正声迈咸濩，易象含羲文。  
玉俎映朝服，金钿明舞茵。韶光雪初霁，圣藻风自薰。  
时泰恩泽溥，功成行缀新。赓歌仰昭回，窃比华封人。

## 《奉和圣制丰年多庆九日示怀》

作者：权德舆 年代：唐

寒露应秋杪，清光澄曙空。泽均行苇厚，年庆华黍丰。  
声明畅八表，宴喜陶九功。文丽日月合，乐和天地同。  
圣言在推诚，臣职惟匪躬。琐细何以报，翺飞淳化中。

## 《和司门殷员外早秋省中书直夜，寄荆南卫象端》

作者：权德舆 年代：唐

共嗟王粲滞荆州，才子为郎忆旧游。凉夜偏宜粉署直，  
清言远待玉人酬。风生北渚烟波阔，露下南宫星汉秋。  
早晚得为同舍侣，知君两地结离忧。

### 《奉和太府韦卿阁老左藏库中假山之作》

作者：权德舆 年代：唐

春山仙掌百花开，九棘腰金有上才。忽向庭中摹峻极，  
如从洞里见昭回。小松已负干霄状，片石皆疑缩地来。  
都内今朝似方外，仍传丽曲寄云台。

### 《酬赵尚书城南看花日晚先归见寄》

作者：权德舆 年代：唐

杜城韦曲遍寻春，处处繁花满目新。  
日暮归鞍不相待，与君同是醉乡人。

### 《郴州换印緘遣之际，率成三韵，因寄李二兄员》

作者：权德舆 年代：唐

緘题桂阳印，持寄朗陵兄。刺举官犹屈，风谣政已成。  
行看换龟纽，奏最谒承明。

### 《寄侍御从舅》

作者：权德舆 年代：唐

靡靡南轩蕙，迎风转芳滋。落落幽涧松，百尺无附枝。  
世物自多故，达人心不羁。偶陈幕中画，未负林间期。  
感恩从慰荐，循性难絷维。野鹤无俗质，孤云多异姿。  
清冷松露滋，照灼岩花迟。终当税尘驾，来就东山嬉。

### 《送张詹事致政归嵩山旧隐》

作者：权德舆 年代：唐

解龟辞汉庭，却忆少微星。直指常持宪，平反更恤刑。  
闲思紫芝侣，归卧白云扃。明诏优筋力，安车适性灵。  
群公来蔼蔼，独鹤去冥冥。想到挥金处，嵩吟枕上青。

### 《献岁送李十兄赴黔中酒后绝句》

作者：权德舆 年代：唐

一樽岁酒且留欢，三峡黔江去路难。  
志士感恩无远近，异时应戴惠文冠。

### 《送殷卿罢举归淮南旧居》

作者：权德舆 年代：唐

计偕十上竟无成，忽忆岩居便独行。志业尝探绝编义，  
风尘虚作弃繻生。岁储应叹山田薄，里社时逢野酝清。  
惆怅中年群从少，相看欲别倍关情。

### 《送崔端公赴度支江陵院三韵》

作者：权德舆 年代：唐

津亭风雪霁，斗酒留征棹。星传指湘江，瑶琴多楚调。  
偏愁欲别处，黯黯颓阳照。

### 《送清洎上人谒信州陆员外》

作者：权德舆 年代：唐

暂辞老去随缘，候晓轻装寄客船。佳句已齐康宝月，  
清谈远指谢临川。滩经水濑逢新雪，路过渔潭宿暝烟。  
暇日若随千骑出，南岩只在郡楼前。

### 《杂言赋得风送崔秀才归白田限三五七七言》

作者：权德舆 年代：唐

响深涧，思啼猿。暗入蘋洲暖，轻随柳陌暄。  
澹荡乍飘云影，芳菲遍满花源。寂寞春江别君处，  
和烟带雨送征轩。

### 《仲秋朝拜昭陵》

作者：权德舆 年代：唐

清秋寿原上，诏拜承吉卜。尝读贞观书，及兹幸斋沐。  
文皇昔潜耀，随季自颠覆。抚运斯顺人，救焚非逐鹿。  
神祇戴元圣，君父纳大麓。良将授兵符，直臣调鼎餗。  
无疆传庆祚，有截荷亭育。仙驭凌紫氛，神游弃黄屋。  
方祗护山迹，先正陪岩腹。杳杳九峻深，沈沈万灵肃。  
鸟飞田已辟，龙去云犹簇。金气爽林峦，乾冈走崖谷。  
吾皇弘孝理，率土蒙景福。拥佑乃清夷，威灵谅回复。  
礼承三公重，心愧二卿禄。展敬何所伸，曾以斧山木。

### 《夜》

作者：权德舆 年代：唐

猿声到枕上，愁梦纷难理。寂寞深夜寒，青霜落秋水。

### 《从叔将军宅蔷薇花开，太府韦卿有题壁长句，》

作者：权德舆 年代：唐

环列从容蹀躞归，光风骀荡发红薇。莺藏密叶宜新霁，  
蹀躞低枝爱晚晖。艳色当轩迷舞袖，繁香满径拂朝衣。  
名卿洞壑仍相近，佳句新成和者稀。

### 《与沈十九拾遗同游栖霞寺上方于亮上人院会宿》

作者：权德舆 年代：唐

摄山标胜绝，暇日谐想瞩。萦纡松路深，缭绕云岩曲。  
重楼回树杪，古像凿山腹。人远水木清，地深兰桂馥。  
层台耸金碧，绝顶摩净绿。下界诚可悲，南朝纷在目。  
焚香入古殿，待月出深竹。稍觉天籁清，自伤人世促。  
宗雷此相遇，偃放从所欲。清论松枝低，闲吟茗花熟。  
一生如土梗，万虑相桎梏。永愿事潜师，穷年此栖宿。  
偶来人境外，心赏幸随君。古殿烟霞夕，深山松桂薰。  
岩花点寒溜，石磴扫春云。清净诸天近，喧尘下界分。  
名僧康宝月，上客沈休文。共宿东林夜，清猿彻曙闻。

## 《工部发引日属伤足卧疾不遂执紼》

作者：权德舆 年代：唐

子春伤足日，况有寝门哀。元伯归全去，无由白马来。  
笳箫里巷咽，龟筮墓田开。片石潺湲泪，含悲叙史才。

## 《药名诗》

作者：权德舆 年代：唐

七泽兰芳千里春，潇湘花落石磷磷。  
有时浪白微风起，坐钓藤阴不见人。

## 《祗役江西路上以诗代书寄内》

作者：权德舆 年代：唐

辛苦事行役，风波倦晨暮。摇摇结遐心，靡靡即长路。  
别来如昨日，每见缺蟾兔。潮信催客帆，春光变江树。  
宦游岂云惬，归梦无复数。愧非超旷姿，循此踟促步。  
笑言思暇日，规劝多远度。鹑服我久安，荆钗君所慕。  
伊予多昧理，初不涉世务。适因拥肿材，成此懒慢趣。  
一身常抱病，不复理章句。胸中无町畦，与物且多忤。  
既非大川楫，则守南山雾。胡为出处间，徒使名利污。  
羁孤望予禄，孩稚待我哺。未能即忘怀，恨恨以此故。  
终当税鞵鞅，岂待毕婚娶。如何久人寰，俯仰学举措。  
衡茅去迢递，水陆两驰鹜。晰晰窥晓星，涂涂践朝露。  
静闻田鹤起，远见沙鸨聚。怪石不易跻，急湍那可溯。  
渔商闻远岸，烟火明古渡。下碇夜已深，上碇波不驻。  
畏途信非一，离念纷难具。枕席有馀清，壶觞无与晤。  
南方出兰桂，归日自分付。北窗留琴书，无乃委童孺。  
春江足鱼雁，彼此勤尺素。早晚到中闺，怡然两相顾。

## 《清明日次弋阳》

作者：权德舆 年代：唐

自叹清明在远乡，桐花覆水葛溪长。  
家人定是持新火，点作孤灯照洞房。

## 《感寓》

作者：权德舆 年代：唐

残雨倦欹枕，病中时序分。秋虫与秋叶，一夜隔窗闻。  
虚室对摇落，晤言无与群。冥心试观化，世故如丝棼。  
但看鸢戾天，岂见山出云。下里徒击节，朱弦秘南薰。  
梧桐秀朝阳，上有威凤文。终待九成奏，来仪瑞吾君。

## 《李韶州著书，常论释氏之理，贵州有能公遗迹》

作者：权德舆 年代：唐

常日区中暇，时闻象外言。曹溪有宗旨，一为勘心源。

## 《送袁中丞持节册南诏五韵》

作者：权德舆 年代：唐

西南使星去，远彻通朝聘。烟雨夔道深，麾幢汉仪盛。  
途轻五尺险，水爱双流净。上国洽恩波，外臣遵礼命。

离堂驻驹驭，且尽樽中圣。

## 《送张阁老中丞持节册吊回鹘》

作者：权德舆 年代：唐

旌旆翩翩拥汉官，君行常得远人欢。分职南台知礼重，  
辍书东观见才难。金章玉节鸣驺远，白草黄云出塞寒。  
欲散别离唯有醉，暂烦宾从驻征鞍。

## 《九华观宴饯崔十七叔判官赴义武幕兼呈书记萧》

作者：权德舆 年代：唐

炎光三伏昼，洞府宜幽步。宿雨润芝田，鲜风摇桂树。  
阴阴台殿敞，靡靡轩车驻。晚酌临水清，晨装出关路。  
偏荣本郡辟，倍感元臣遇。记室有门人，因君达书素。

## 《赠别表兄韦卿》

作者：权德舆 年代：唐

新读兵书事护羌，腰间宝剑映金章。  
少年百战应轻别，莫笑儒生泪数行。

## 《早夏青龙寺致斋，凭眺感物，因书十四韵》

作者：权德舆 年代：唐

晓出文昌宫，憩兹青莲宇。洁斋奉明祀，凭览伤夙古。  
秦为三月火，汉乃一抔土。诈力自湮沦，霸仪终莽卤。  
中南横峻极，积翠泄云雨。首夏谅清和，芳阴接场圃。  
仁祠闕严净，稽首洗灵府。虚室僧正禅，危梁燕初乳。  
通庄走声利，结驷乃旁午。观化复何如，剖心信为愈。  
盛时忽过量，弱质本无取。静永环中枢，益愧腰下组。  
尘劳期抖擞，陟降聊俯俛。遗韵留壁间，凄然感东武。

## 《酬裴端公八月十五日夜对月见怀》

作者：权德舆 年代：唐

凉夜清秋半，空庭皓月圆。动摇随积水，皎洁满晴天。  
多病嘉期阻，深情丽曲传。偏怀赏心处，同望庾楼前。

## 《严陵钓台下作》

作者：权德舆 年代：唐

绝顶耸苍翠，清湍石磷磷。先生晦其中，天子不得臣。  
心灵栖颢气，纓冕犹缁尘。不乐禁中卧，却归江上春。  
潜驱东汉风，日使薄者醇。焉用佐天子，特此报故人。  
人知大贤心，不独私其身。弛张有深致，耕钓陶天真。  
奈何清风后，扰扰论屈伸。交情同市道，利欲相纷纶。  
我行访遗台，仰古怀逸民。矍缴鸿鹄远，雪霜松桂新。  
江流去不穷，山色凌秋旻。人世自今古，清辉照无垠。

## 《朝元阁》

作者：权德舆 年代：唐

缭垣复道上层霄，十月离宫万国朝。  
胡马忽来清跸去，空馀台殿照山椒。